



BILTEN

BR. 20

Informativne novine IZB u Švedskoj

FEBRUAR 2016

UVODNIK



U nedjelju, 28. februara 2016. godine u Halmstadu je održana Skupština naše omladinske organizacije Bemuf. Bila je to prilika da još jednom svjedočimo kako zlatnu omladinu imamo.

Toliko ozbiljnosti, odgovornosti, tolerancije, a opet sve sa nevjerovatnim osjećajem lahkoće. Izvanredno, zasita!

Neko od starijih prisutnih uzdahnu – kad bi skupštine naših džemata i krovne organizacije

bile ovakve!

Možda bi i bile takve kad bismo serbeznije otvarali vrata odbora našim bemufovcima. Nažalost, još uvijek ima džemata koji nerado omogućavaju da makar predsjednik lokalnog Bemufa bude punopravni član džematskog odbor.

Umjesto zaključka, podsjećamo da je Muhamed, a.s., svoje najbliže saradnike imao upravo među mladima. H. Ebu Bekr je imao 37 godina, h. Omer 27, h. Osman 34, h. Alija 10, Talha ibn Ubejdullah 14, Zubejr ibn Avam 16, Sa`d bin ebi Vekas 17, Seid ibn Zejd 15, Ebud Ubejde 17. Spomenimo i da Poslanik, a.s., pred smrt postavlja osamnaestogodišnjeg mladića Usamu bin Zejda na čelo vojske koju šalje u Siriju. I među onima koje je slao da pozivaju u islam bilo je najviše mladih.

Idriz-ef. Karaman



Poslanikova, s.a.v.s., džamija u Medini

"Svi ste vi pastiri i svi ste odgovorni za svoje stado: vođa je pastir i on je odgovoran za svoje stado, čovjek je pastir u svojoj porodici i on je odgovoran za svoje stado, žena je pastirica u kući svoga muža i odgovorna je za svoje stado, sluga je pastir u imetku svoga gazde i on je odgovoran za svoje stado; svi ste vi pastiri i svi ste vi odgovorni za svoje stado."

hadis

SADRŽAJ

- Fetva o hidžabu
- Članarina preko poreza
- Vjerske slobode u Švedskoj
- Seminar za roditelje
- Mektebski ručak i druženje
- IZBUŠ: YouTube kanal
- Pitanja i odgovori

www.izb.se
Potražite nas i na facebook-u
Islamska zajednica Bošnjaka u
Švedskoj

Fetva Vijeća muftija o obavez- nosti nošenja hidžaba

Razmatrajući implikacije zaključka Visokog sudskog i tužilačkog vijeća Bosne i Hercegovine, kojim se daje tumačenje zakonskih odredbi o sudovima u Federaciji Bosne i Hercegovine, Republici Srpskoj i Brčko Distriktu te odredbi o sudačkim i tužilačkim kodeksima, aktueliziranog u dopisu poslanom svim sudovima i tužilaštvima u Bosni i Hercegovini, kojim se rukovodiocima pravosudnih institucija skreće pažnja na zabranu nošenja vjerskih simbola i obilježja svim uposlenim u pravosudnim institucijama Bosne i Hercegovine, na vjerske slobode i prava žena muslimanki koje nose hidžab, odnosno mahramu na glavi, posebno imajući u vidu pokušaje nekih članova VSTV-a da vlastitim tumačenjem opće zakonske odredbe podvedu hidžab/mahramu pod ovu zabranu, upuštajući se pri tome u tumačenje islamskih simbola i obilježja, a što nije u njihovoj nadležnosti niti kompetenciji, Vijeće muftija je na svojoj Šestoj redovnoj sjednici održanoj 16. džumade-l-ula, 1437. god. po H./25. februara 2016. godine u Sarajevu donijelo sljedeću

F E T V U

Hidžab, odnosno mahrama koju nose muslimanke, jeste vjerska obaveza i odjevna praksa muslimanke propisana osnovnim izvorima islama, Kur'anom i Sunnetom te idžmaom. Svevišnji Allah, dž.š., u Kur'anu kaže:

O Vjerovjesniče, reci ženama svojim i kćerima svojim i ženama vjernika neka spuste haljine svoje niza se... (EI-Ahzab, 59);

A reci vjericama neka obore poglede svoje i neka vode brigu o stidnim mjestima svojim; i neka ne dozvole da se od ukrasa njihovih vidi išta osim onoga što je ionako spoljašnje, i neka vela svoja spuste na grudi svoje... (En-Nur, 31).



Članarina preko poreza

Broj potpisanih pristupnica u džematima IZBUŠ		
	07-01-16	17-02-16
Malmö	1393	1405
Stockholm	1122	1126
Borås	686	693
Skövde	508	508
Göteborg	740	775
Gislaved	413	413
Norrköping	558	563
Helsingborg	407	411
Landskrona	406	413
Trollhättan	311	315
Växjö	238	240
Linköping	273	275
Halmstad	206	211
Trelleborg	253	257
Jönköping	297	305
Motala	150	152
Örebro	162	162
Surte	82	85
Västerås	41	41
Vetlanda	50	70
Värnamo	21	19
Varberg	56	60
Karlstad	25	25
Karlskoga	0	0
Kalmar	0	0
Oskarshamn	0	0





ISLAMSKA ZAJEDNICA U BOSNI I HERCEGOVINI

*„A reci vjericama
neka obore poglede
svoje i neka vode
brigu o stidnim
mjestima svojim; i
neka ne dozvole da
se od ukrasa njihovih
vidi išta osim onoga
što je ionako
spoljašnje, i neka
vela svoja spuste na
grudi svoje...“ (En-
Nur, 31)*

*„Na obaveznost
hidžaba ukazuje i
hadis Božijeg
Poslanika, a.s., koga
je zabilježio Ebu
Davud u svom
Sunenu od Aiše, r.a.,
u kome se navodi da
je Vjerovjesnik, a.s.,
rekao Esmi, kćeri
Ebu Bekrovoj:
„Esma, kada žensko
postane punoljetno,
nije dozvoljeno da joj
se vidi išta drugo
osim ovoga i ovoga,
pokazavši na lice i
šake.“*

Znameniti komentator Kur'ana Ibn Abbas, r.a., protumačio je da se riječi *osim onoga što je ionako spoljašnje* odnose na lice i šake.

Na obaveznost hidžaba ukazuje i hadis Božijeg Poslanika, a.s., koga je zabilježio Ebu Davud u svom *Sunenu* od Aiše, r.a., u kome se navodi da je Vjerovjesnik, a.s., rekao Esmi, kćeri Ebu Bekrovoj: „Esma, kada žensko postane punoljetno, nije dozvoljeno da joj se vidi išta drugo osim ovoga i ovoga, pokazavši na lice i šake.“

Općepoznato je da su muslimanke u vrijeme Poslanika, a.s., i kasnijih generacija, slijedeći spomenutu kur'ansku naredbu i Poslanikovu, a.s., uputu, nosile hidžab.

U fikhskim djelima se spominje *idžma'* – jednoglasnost uleme o obaveznosti hidžaba za ženu muslimanku.

U užem značenju pojam hidžab se koristi kao sinonim za pokrivanje glave mahramom, a u širem smislu kao poseban stil odijevanja koji je u skladu s islamskim normama. U odnosu na međunarodne kodifikacije ljudskih prava hidžab spada u domen ispovijedanja vjere.

Prema tumačenju naše (hanefijske) pravne škole te većine ostalih pravnih škola i samostalnih mudžtehida, hidžab u širem smislu podrazumijeva pokrivanje cijelog tijela izuzev lica i šaka. Pokrivanje lica (nikab, burka, feredža) ne spada u vjerske obaveze muslimanke.

Hidžab, odnosno mahrama u islamskoj tradiciji, ne tretira se kao poseban vjerski simbol i obilježje, kao što to nisu ni ostali odjevni predmeti kojima se pokrivaju drugi dijelovi ljudskog tijela a koji, također, čine sastavni dio odjevne prakse muslimanke, te stoga ne mogu biti obuhvaćeni zakonskom odredbom o zabrani isticanja vjerskih simbola i obilježja u pravosudnim institucijama.

Podržavajući načelno zakonsku odredbu o zabrani isticanja vjerskih simbola i obilježja u pravosudnim institucijama, kao i princip odvojenosti vjerskih institucija i države, te uzimajući u obzir činjenicu da mahrama koju nose muslimanke ne predstavlja simbol i obilježje islama, Vijeće muftija smatra da bi zabrana nošenja mahrame ženama muslimankama u pravosudnim i drugim institucijama predstavljala flagrantan oblik diskriminacije i kršenje njihovih vjerskih i ljudskih prava.

Uzimajući u obzir činjenicu da Kur'an na više mjesta izričito naređuje da se prilikom suđenja i svjedočenja primjenjuje princip istine i pravde, makar to bilo i protiv bližnje rodbine, jasno je da nema mjesta bojazni da bi nošenje mahrame, kao manifestacije prava na slobodu vjere, moglo uzrokovati vjerski motiviranu pristrasnost. Nekorektno je i nepravedno pripisivati nekome pristrasnost na osnovu Ustavom i zakonom zagarantiranog manifestiranja prava na slobodu vjere.

Husein-ef. Kavazović
Reisu-l-ulema



„Prije skoro 300 godina , tačnije 12. februara 1718. godine muslimani i jevreji su dobili djelimične vjerske slobode.“

Vjerske slobode u Švedskoj

Prije skoro 300 godina , tačnije 12. februara 1718. godine muslimani i jevreji su dobili djelimične vjerske slobode. Imamo razloga da slavimo ovaj dan.

Švedski kralj Karl VII, je taj koji je za vrijeme svoga mandata iz Turske u Švedsku uvezao sarmu, ali i prvi državnik koji je dao vjerske slobode muslimanima i jevrejima u Švedskoj. Za vrijeme njegove vladavine Švedska je ostala bez velikog posjeda zemljišta van Švedske.

Ali i kao u većini slučaja pisanje historije je u rukama pisaca, odnosno koji dio historije su oni odlučili da prepričaju, da istaknu.

Već, davne 1715. godine, kad je Karl VII stigao u Trelleborg, imao je u svojoj pratnji 16 muslimana i njihove porodice, te par jevreja koji su došli kao gosti u Lund.



Za vrijeme svog boravka van Švedske , Karl VII je proveo 5 godina u multireligijskom Osmanskom carstvu. Podrazumijevalo se da je pratnja imala vjerske slobode i kad stigne u Švedsku. Isto pravo koje je Karl VII imao kad je uživao zaštitu Osmanskog sultana.

Jedan od razloga zbog kojeg su muslimani doputovali u Švedsku jeste svakako i veliki novčani dug što je švedski kralj imao. Dug je iznosio 2,5 miliona „riksdala“ što je iznosilo pola godišnjeg BNP Kraljevine Švedske. Proveo je 5 godine nakon što je harao južnom Evropom. Sultan ga je primio prvo na liječenje da bi kasnije proveo vrijeme u naučnim istraživanjima putujući po hilafetu.

Cijela ova pratnja koja je brojala 60 osoba smjestila se u Karlshamn i Karlskronu. Treba iz pratnje izdvojiti muslimana po imenu Hadži Jusuf porijeklom iz Jerusalema koji je pravio novčanice. Te Ali Pašu koji je bio redovan gost biblioteke u Lundu.

Ovaj dio pratnje koji je bio smješten u Karlskroni su čak dobili pismenu dozvolu za vjerske slobode.

U ovom očuvanom pismu iz Lunda napisanog 12. februara 1718. godine navedeno je da Kralj Karl VII dozvoljava muslimanima i jevrejima da drže molitvene obrede, sunete djecu i da kopaju svoje umrle.

U to vrijeme je bio zakon da se isključivo ispovijeda kršćanstvo tako da je iz tog razloga ova muslimansko-jevrejska pratnja tražila pismenu dozvolu za vjerske slobode.

Ovo je najvjerojatnije prvi put da se muslimanima i jevrejima odobrava vjerska sloboda i da se to čak i pismeno zabilježi.

Tek 1779. godine za vrijeme vladavine Kralja Gustav II usvojen je zakon o vjerskim slobodama.

Kad se izmirio dug Osmanskom sultanu, muslimani su i nestali iz Švedske.

Dobro je spomenuti i činjenicu da je prvi muslimanski džemat u Švedskoj osnovan 1949. godine.

Povodom ove značajne obljetnice dana 12. februara 2016. godine u Lundu je Alen-ef. Delić, ispred islamskih organizacija južne Švedske, zajedno sa predstavnicima Jevrejske zajednice, uputio isto pismo kao Karl VII prije 298 godina, ali ovaj put na adresu ministrice za kulturu i demokratiju Alice Bah Khunke i švedskom Kralju.

Alen-ef. Delić

„U ovom očuvanom pismu iz Lunda napisanog 12. februara 1718. godine navedeno je da Kralj Karl VII dozvoljava muslimanima i jevrejima da drže molitvene obrede, sunete djecu i da kopaju svoje umrle. U to vrijeme je bio zakon da se isključivo ispovijeda kršćanstvo tako da je iz tog razloga ova muslimansko-jevrejska pratnja tražila pismenu dozvolu za vjerske slobode. Ovo je najvjerojatnije prvi put da se muslimanima i jevrejima odobrava vjerska sloboda i da se to čak i pismeno zabilježi.“



Džemat Halmstad: Seminar za roditelje

”Uloga i značaj bosanskog jezika u očuvanju identiteta”

Dana 28. februara 2016.g., u džematu Halmstad organizovan je drugi po redu, jednodnevni seminar za roditelje, čija djeca pohađaju mektebsku nastavu.

Tema seminara je bila: ”Uloga i značaj bosanskog jezika u očuvanju identiteta.”

Seminar je organizovan u saradnji sa Institutom za bosanski jezik i omladinskom organizacijom BEMUF.

Program seminara je započeo okupljanjem roditelja na zajedničkom doručku u prostorijama džemata. A nakon što je program seminara otvoren učenjem Kur’ana, imam džemata Almedin-ef. se obratio prisutnima, te se pristupilo analizi zaključaka sa prvog seminara koji je održan u decembru 2015.god. na temu: ”Kakav mekteb želimo?”.

Ispred Instituta za bosanski jezik, prisutnima su se obratili dr.sc. Alen Kalajdžija, koji je ovom prilikom govorio na temu: ”Historija bosanskog jezika od najstarijih vremena do danas”, zatim, odmah poslije dr.Kalajdžije, prisutnima se obratio i prof.Hadžem Hajdarević, te govorio na temu: ”Uloga porodice u očuvanju bosanskog jezika i bosanskojezičkog naslijeđa.”




Poslije ovih obraćanja pristupilo se zajedničkom klanjaju podne-namaza, a odmah poslije klanjanja namaza prisutnima se obratio i treći gost predavač mr.sc. Aida Kršo na temu: ”Metode učenja i očuvanja bosanskog jezika u bh.iseljentištvu.”

Seminaru je prisustvovao i glavni imam Islamske zajednice Bošnjaka u Švedskoj Idriz-ef. Karaman, koji je u svom obraćanju čestitao džematu i imamu na organizovanju stručnog seminara, te, govorio o pozitivnim iskustvima prisustvovanja konferenciji i skupštini koju je organizovao Bemuf, kao i skupštini našeg džemata u Gislavedu.

Seminaru je prisustvovao veći broj roditelja, kao i učitelji bosanskog jezika iz Halmstada i Laholma.

Program seminara je završen zajedničkim ručkom u prostorijama džemata, koji su i ovaj put pripremile vrijedne džematličke u Halmstadu.

Naredni seminar za roditelje je planiran u drugoj polovini maja, kao predramazanski seminar.



ZAPIS O BOSNI (MAK DIZDAR)

Pitao jednom tako
jednoga vrli pitac neki
A kto je ta šta je ta da
proštiš
Gdje li je ta
Odakle je
Kuda je
Ta Bosna
Rekti

A zapitani odgovor
njemu hitan tad dade:
Bosna da proštiš jedan
zemlja imade
I posna i bosna da proštiš
I hladna i gladna
I k tomu još
Da proštiš
Prkosna
Od
Sna.

Džemat Helsingborg: Mektebski ručak i druženje

Dana 28. februara 2016. godine u džematu Helsingborg održan je mektebski ručak i druženje za sve polaznike mektebske nastave i njihove roditelje.

Ovakvo zajedničko druženje održava se svaka 2-3 mjeseca, a dodatni povod ovog druženje bilo je i obilježavanje Dana nezavisnosti BiH. Pored prisustva roditelja i djece, susretu su prisustvovala i nastavnice bosanskog jezika u Helsingborgu Šemsija Omeragić i Tica Omeragić.

Nakon uvodnog obraćanja Nezir ef. Špiodića i prezentacije "Čuvajmo identitet" prisutnima se obratila nastavnica Šemsija podcrtavajući vrijednost čuvanja bosanskog jezika, a samim tim i našeg identiteta. Ovom susretu prisustvovala je i predstavnik FK Bosna u Helsingborgu Admir Čato koji je prisutne upoznao i pozvao na aktivnije učešće i podršku u zajedničkim aktivnosima.

Druženje je završeno ručkom i fikom za sve prisutne.

Nezir ef. Špiodić





Sufara.ba
interaktivna

Bemuf

Muslimanski omladinski
savez u Švedskoj
www.bemuf.org



24h uživo prijenos iz
Mekke uz učenje
Kur'ana
YouTube:
"Makkah Live HD"

YouTube kanal Islamske zajednice Bošnjaka u Švedskoj

Sa zadovoljstvom vas obavještavamo da je:

- Otvoren youtube kanal Islamske zajednice Bošnjaka u Švedskoj, pod nazivom „BIS Sverige“;
- Ovdje možete naći sve zabilježene video snimke, predavanja i druženja sa aktivnosti naših džemata u Švedskoj;
- Vašoj pažnji posebno preporučujemo mektebski materijal koji je prilagođen trenutnim udžbenicima čime je olakšano učenje mektebskih sadržaja našoj djeci;
- Kanal će se redovno ažurirati i dopunjavati novim sadržajima, te vas pozivamo da nas redovno PRATITE putem donjeg linka:

https://www.youtube.com/channel/UCE1A3ZtznT7B_ZcAj3tfcZg



BIS Sverige

Visa som: Dig själv

Prenumerera 10

Hem Videoklipp **Spellistor** Kanaler Diskussion Om

Skapade spellistor Ny spellista

Senast tillagd till Rutnät



Predavanja
Uppdaterades idag



Ilmihal NIVO I



Ilmihal NIVO II



Ilmihal NIVO III



Ilmihal NIVO IV



Hutbe

PITANJA I ODGOVORI

Na Vaša pitanja odgovara muftija
dr. Enes Ljevaković.



Vaša pitanja možete slati na e-mail:

pitanja@rijaset.ba

Pitanje:

Esselamu alejkum!

Da li je ispravan namaz osobi koja sjedi na stolici u prvom safu?

Odgovor:

Esselamu alejkum!

Ako takve osobe imaju opravdanje za sjedenje na stolici, tj. nisu u stanju obavljati sve farzove na propisani način, namaz će biti ispravan. Klanjanje na stolici bez nužde čini namaz neispravnim, zbog propuštenih namaskih farzova. Preporučuje se takvim osobama da stolice stave ukraj safa tako da ne ometaju klanjače u safu iza njih. Općenito,

nije dobro da se prostor džamije ispunjava stolicama. U nuždi, može se klanjati i sjedeći na tepihu, bez stolice.



www.islamskazajednica.ba

POZIV NA SARADNJU

Oglasite se i Vi u Biltenu IZB u Švedskoj!

Javite nam se sa vašim tekstom, prijedlogom, primjedbom i sugestijom.

e-mail: bilten@izb.se



BILTEN

Informativne novine

Islamske zajednice
Bošnjaka u Švedskoj

GLAVNI UREDNIK

Idriz-ef. Karaman
glavni imam

IZVRŠNI UREDNIK

Almedin-ef. Spahić

REDAKCIJA:

Savjet glavnog imama:

Nezir-ef. Špiodić

Smajo-ef. Šahat

Elvedin-ef. Bešlija

Stari brojevi/arhiva:

www.izb.se/index.php/bilten

Saradnici u ovom broju:

Alen-ef. Delić, Malmö

Jasmin Dervišević, sekretar
IZBUŠ-a